

قصيدة «جُنون حُبّه»

باعدي كثير علي الصفحة

ألاقي ف حبنا لمحاة

وكلمة قالها من قلبه

بيها حسينا بفرحة

ودمعة من ورا رسالة

و صرخة عشق متشاله

أعمل لايك و بدموعي

أتحسر على الحالة

وأفكر لما هزرنا

قوام وبسرعة قررنا

نكتب كلمتين عنا

و صورة لنظرة قتاله

بتحكي حكاية منسية
بهمسة شوق وحنية
لا حساس عدى كل حدود
يقولوا عليه.. رومانسية

ولما نعدي ونخطي
أكتب له أنا بخطي
وأقول لحروفي ما تخطي
قولي له علي اللي كان فيا

ولما تعدي أعيادنا
وسط جنوننا وعنادنا
نموت م الشوق لبعضينا
ونملا الصفحة بوعدنا

ونحلف إن حبنا مات
ولا باقي لهواه دقات
وجوه قلوبنا نلقى حاجات
تاخذنا تاني لردودنا

وأشوف حبه في كام حاجة
وأنا للعشق محتاجة
ومن قلبي هاموت م الشوق
أرد بطيبة وسذاجة

وأعمل نفسي مش فاكرة
وابقي لبعدنا ناكرة
واقوله نتقابل بكرة
وأجيب سيرته في هاشتاجه

يرد بفرحة مخفية
وأنا للهفة.. مدارية
ويتعزز على قلبي
يقول بكره ماهوش ليا

عشان مشغول وعنده حاجات
هتاخذ منه بعض ساعات
ووقت الفجر يكتب لي
صباحك أجمل الأوقات

ألاقي البوست أمنشن له
وأعلق له وأفنن له
عشان يرجع يدوق حبي
ويعرف إنني أستاهله
